

INUIT ATAQATIGIIT

Inatsisartuni



UKA 2018/38
07.11.2018
Aqqa Samuelson

Inuit inigisaminniit anisitaasarunnaarnissaat siunertaralugu Naalackersuisut periusissiamik UPA2019-imi saqqummiussassamik suliaqaqqullugit peqquneqarnissaat Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Inuit ataasiakkaat inigisaminnit anisitaasarunnaarnissaat siunertaralugu Naalackersuisut periusissiamik UPA2019-imi saqqummiussassamik suliaqarnissaat pissutissaqarluartoq Inuit Ataqatigiit isumaqarput.

Ullutsinni siunissamilu inuiaqatigiit akornanni unammisassarpassuaqartugut innuttaasut pissarliulernermikkut pissuteqartumik inigisaminnit anisitaasernerat ilungersunartutut oqaatigisariaqarpoq. Inuit amerlasuut namminneq piunassuserinngisaminnik, inuunerlu nalunartoqartuaannartoq ingerlavigitillugu qanorluunniit ilinikkut inigisaminnik anisitaasinnaapput. Inuit inigisaminnit anisitaasarunnaarnissaannut periusissiornikkut, siunnersuisarnerup pitsanngorsarneratigut siunnersuisarnerullu annertusarneratigut pinaveersimatinniarneqarsinnaasoq Inuit Ataqatigiit isumaqarput. Inuit ataasiakkaat nammineq pisuussutiginngisaminnik napparsimalernermikkut, suliffeerunnermikkut allatigulluunniit timikkut tarnikkullu peqqiilluteqalernermikkut inigisaminnik annaasaqarsinnaasarput. Inuunerup ingerlanerani pissarliulerluni angerlarsimaffeerunnermi saaffissaarunnermilu siunnersorneqarnissaq isumassorneqarnissarlu pinngitsoorneqarsinnaanngillat. Inuit ataasiakkaat angerlarsimaffeerullutik katataagaluttuinnassanngippata, angerlarsimaffeeruttullu amerligaluttuinnassanngippata Naalackersuisut periusissiamik saqqummiussariaqartut Inuit Ataqatigiit isumaqarput.

Inuit ikiortariaqavissut periusissiornikkut ikorfartorneqarnerunissaat qulakkeerneqartariaqarpoq. Matumanilu inuit ikiortariallit tassaapput angerlarsimaffeerussimasut allatigulluunniit pissarliulernermikkut oqqiffissaarussimasut.

Toqqissisimasumik inuuneqassagaanni angerlarsimaffeqarnissaq oqqiffissaqarnissarlu pinngitsoorneqarsinnaanngilaq, annermik ilaqutariit meerartallit eqqarsaatigalugit. Meeqqat inatsisitigut sukannersumik illersugaatillugit, meeqqallu pisinnaatitaaffii toqqammavigalugit – meeqqat toqqissisimasumik avatangiiseqarlutik peroriartornissaat qulakkeertariaqarparput. Inuiaqatigiit akornanni

angerlarsimaffeeruttarneq eqqarsaatigalugu aarlerinartumik inissittoqarsinnaannera oqaatigineqartariaqarpoq. Ilaqutariit meerartallit eqqarsaatigalugit ajornartorsiutip kinguaariinnut kingornunneqarluni ingerlaqqittarnissaa aarlerinartuuvoq.. Erseqqinnerusumik periusissioinnikkut ilaqutariinnut aarlerinartorsiortunut qanimanartumillu inissisimasunut periusissioinnikkut inigisamit anisitaasarunnaarnissaaq pinaveersimatinneqarsinnaavoq, tamannalu ilaqutariinnut meerartalinnut, minnerunngitsumillu inuiaqatigiinnut tamanut iluaqutaasussaalluni.

Nuna tamakkerlugu iluaqutaalertussamik sunniuteqarluartussamillu inuit inigisaminnit anisitaasarunnaarnissaannut siunertaqartumik Naalakkersuisut periusissioinnikkut Inuit Ataqtigii tamakkiisumik tapersersorpaat.

Inuiaqatigiit ataatsimut isigalugit inuit inigisaminnit anisitaasartut amerliartortillugit, periusissamillu maannakkut amigaateqartoqartillugu Aqqaluaq B. Egedep siunnersuutaa pissusissamisoorluinnartoq Inuit Ataqtigii isumaqarput.

Taamatut oqaaseqarluta Aqqaluaq B. Egedep siunnersuutaa taperserlugu ataatsimiititaliamut ingerlateqqinneqarnissaa innersuussutigaarput.